

福建續志卷五十四

文苑二

泉州府

宋

鄭褒字成之惠安人宋初承五代後文格卑弱褒力去浮華直追古作者咸平元年登第未命下卒有集十卷行世蔡襄論閩中文章自歐陽詹後惟推

褒云

府志

江致堯字聖俞惠安人少用力於六經以特奏任法曹官務煩冗而丹鉛不輟有周禮解及詩集

府志

福建續志

卷五十四 文苑二

一

曾慥字端伯晉江人初爲尚書郎直寶文閣奉祠博學能詩居銀峰集百家之說類纂成書可以資治體助名教廣聞見供笑談凡六百餘種

府志

陳景溫字子實晉江人淳熙間列上庠詞賦擅名弱冠入京補試以大衍天地之樞爲題景溫講析四象要義甚詳應試者皆來授指以內舍生卒同郡林冠英高仲魏奕士明陳世仁仁卿陳時中子周許國光潛仲王照復成之等皆與景溫同時知名

府志

許衍同安人隱居苦學博通經傳子史編田舍墨記

四十卷志府

元

趙希直晉江人宋宗室里第藏書贏於巷市悉遍讀之尤以善詩聞張以寧稱其短章清妍妥適長篇滔滔汨汨簡斷而思溢人不足己獨多也志府

明

陳亦言字汝納晉江人元至正間自古田侍父來官
汭州鹽場因家馬刻苦力學貫穿經傳子史詩賦
尤工洪武初不樂仕進著有潛齋集志府

劉嵩字子中晉江人博通經史所爲詩文清新竒古

福建續志

卷五十四 文苑二 二

不俟思索人謂其有謫仙才洪武初以賢良方正
薦授廣西賓州判官卒泉名士多出其門著有中

齋集志府

楊曜宗字世顯晉江人幼聰警經史百氏靡不博涉
洪武中以明經薦授晉江訓導擢韓府紀善遷左
右長史輔獻恭二王以禮爲文溫潤典則詩清暢
麗密學者稱思復先生有桐月山房稿志府

郭廬字居賢以字行晉江人治壁經學博今古而磊
落多竒節洪武丁卯鄉薦授淦川臨武教諭詩平
淡古雅中復慷慨雄渾胡儼稱爲逸才有淦川遺

稿志府

溫良字元吉晉江人學問該洽工晉唐書法正統中舉於鄉授中書舍人預修宋元綱鑑一統志英宗實錄李東陽稱其書法有李北海趙文敏之風舊志

學參願編

莊鵬字萬里惠安人成化丙午舉人授新寧教諭議經術考古制釐正文字程式以變易學者習尚鵬獨居一室點勘書史雖分注小字亦備精細作爲文閎麗可喜縱橫穿貫莫窮其辨有遺稿藏於家

閩書參小山類稿小

福建續志

卷五十四 文苑二 三

林鴻儒字允德惠安人祖光有隱德父密以孝聞鴻儒亦善事父母治尙書專其經著有尙書目錄治書者宗其說王慎中竒其文以通於唐順之唐亦驚異與定交志府

朱梧字子棐晉江人嘉靖丁酉舉於鄉力學而尤長於詩就職博士遷楚令行潔而材迂遂罷歸徧閱唐人詩手抄口語結爲詩社嘯咏往來不絕其詩與山人陳鷗江一鯉于宗亮朱汶詩彙刻王慎中

序之志府

朱汶號碧潭晉江人以名家子少從父薄遊歷覽名

勝退學詩屋壁戶牖題墨皆滿一日郡守出訪汶
燒筍煮茗以飲於是泉人乃知有朱詩人書閩

江一鯉號草塘晉江人倜儻喜談孫吳豪氣過人盡
傾一座既與朱汶于宗亮等結社格調清越音節
鏘然而無矯舉匡拂之意陳鷗號忘機于宗亮字

○○皆豪宕工爲詩與一鯉友善名與之埒書閩

張寯字仲士惠安人岳次子少淹貫如宿學文思波
湧嘉靖末祭酒陳廷敬試冠六館士秋試主司林
爓讀其五策置前矛後知爲襄惠家兒喜曰三篋
之風不墜矣所著有論史存半稿志府

福建續志

卷五十四 文苑二 四

郭文煥字仲實晉江人嘉靖歲貢授高安訓導自少
究心理學四書易經太極通書正蒙俱有註釋間
或發蔡清所未發讀史別出論斷四書學庸口義
成於林希元存疑未出之前論議多脗合者志府

張鳳徵字舜夫號治庭同安人生而穎敏襁褓中輒
能識壁上字九歲通五經大義嘉靖乙丑進士觀
政御史臺病卒子繼桂萬歷乙未進士仕華亭松

陽知縣清白稿

鄭昭字養晦惠安人博學嗜古爲詩文奧衍成家著
有小園抱甕錄蠹木賦何喬遠刻入文徵又作桃

源行落落五百餘言清真簡遠超然塵壒之外居家課子有處世寧須辭爵祿立身全賴有詩書之

句徐氏
筆精

周良宰字以制號肖慙晉江人泉故多習易少治戴經者良宰獨以是名家所從授經者莫不博科第去若何喬遷其一也良宰授弟子經三場兼通不

顓制義

何鏡山
文集

何喬遷字齊孝晉江人與弟儀部喬遠世其父炯學同習戴經初治博士有聲最後攻古文辭峻潔典亮矩矱歐曾萬歷丙子舉於鄉授建陽教諭歷大

福建續志

卷五十四

文苑二

五

理評事多所平反卒之日篋無十金

府志

郭偉字洙源晉江人髫歲以文學名萬歷初李廷機諸人爲紫雲會偉與焉纂鼇頭龍翔集註并集註發明衍義真銓珠璣歸正抄評正宗共八種海內家傳戶誦繼而流寓金陵撰崇正錄名公答問等書三十七種最後成集註全書年七十餘卒

府志

留湛然字敦照號鑑泉晉江人宋忠宣公正之後舉萬歷鄉試資不敏而善強記一經腹笥永如自閱至構思屬筆則劃然心開滌麗旁溢卽宿儒謝弗逮

黃志清字以度號鷺峰晉江人父錫知鄧州志清年十四見知於督學胡定萬歷中成進士選翰林院庶吉士授編修益沉酣經史殫精義易及館選後又旁通天文地輿日歷術數年三十六卒於京

閩書

參何鏡山集

洪猷字文振號積齋晉江人家貧力學授徒取陳真晟心圖蔡清密箴爲士誦之解咸艮二卦謂艮者止也君子思不出其位則靜而非虛矣咸者感也君子虛以受人則動而非實矣萬歷十七年應貢授南安訓導時以講藝中指點身心性學

閩書參雲臺藏

福建續志

卷五十四 文苑二

六

稿

陳鏜字巽鄉號斗山惠安人嗜古文詞稽核典故邑中戶口賦役關堡阨塞原隰高下之等衣食制作之原瞭若指掌領萬歷鄉薦會大司農檄丈天下田賦鏜言於令曰官吏行清丈而民滋累但以一二虛數分配百千里田之家所賠不過錙銖而騷擾之費詭射之弊無復爲民困者於是均賦止丈民大稱便著有詩文集若干卷子廉萬歷進士廣

東按察使

採霞樓藏稿

林如源字維清晉江人少孤勵志好學長構五因別

業讀書其中自十三經二十一史以迨諸子百家博聞強識孜孜不倦所著有綱目集要史評八閩名山川誌掇名誌五因閒鈔何司徒佳話諸書凡十餘種精於詩賦人呼爲五因先生

志府

蔣熺字晦之晉江人相國德璟次子三歲誦唐詩數十首四歲遍讀四書以次讀詩書諸經覽父架上子史輒曉大意八歲能文九歲作武王周公桀紂諸論多翻古案十歲從父北征遇景輒咏十一策魏璫必敗曰此豎極橫丙寅丁卯敗立至矣魏果以是秋磔死及長喜讀易及太元譚理出人意表

福建續志

卷五十四

文苑二

七

復究心理學以王文爲師秋赴省試感寒疾而卒僅十九耳有遺集名童真子集

巖節集

國朝

阮旻錫字疇生爲明功臣某之後從峽江曾櫻遊傳心性之學又講習風雅旁及道藏釋典諸子百家兵法戰陣醫卜方伎之書無不博洽淹貫鼎革後棄舉子業遊歷吳越齊魯燕趙以詩自娛學者稱輪山先生著有存稿

志府

李登卿字得御南安諸生幼以文受知於何鏡山郡中開任仁穎社皆以登卿領袖從者雲集著有詹

詹言及勵行語錄志府

傅爲霖字石漪號晦三南安人明會元夏器之後由海上納欵制軍姚啓聖頗得其力爲霖能文工詩初授松江府通判卽攜其祖夏器錦泉集與太倉吳偉業松江周茂源校梓之爲詩有秀骨逸氣饒於滌而沉於思著有賜谷文集別集志府

陳允錫字子帥號疊齋晉江人善讀書五經子史詩文靡不淹貫順治乙未以人才舉試一等授德化教諭改扶風縣丞流寇掠邑允錫朗誦衙齋寇問何以不去曰吾爲朝廷吏與城存亡去將何之寇

福建續志

卷五十四 文苑二 八

竒而去歷官布政司都事以文名聘修志書如鳳翔府志江西通志皆出其手久仕閒曹益肆力於經史詩文有十三經解二十一史緯諸子鈔古今詩刪古今文選疊齋集皆膾炙人口遷平湖令乞

休歸

陳介石撰志
參陳氏家傳

李兆慶字賴甫號惟念安溪人兄弟六人皆力學著聲兆慶性至孝尤篤嗜正學屬文不拘繩尺而淹博宏深順治乙未全家陷賊中仲兄日燦募死士擊賊數戰賊窮促走兆慶及家屬得脫於難歸後鍵戶掃却課子弟讀書平生踐履篤實與前賢理

學語錄默相契合子光地大學士志府

許學衡字徵若號少魯惠安人中順治間副榜選泰寧教諭未仕而卒學衡少學制藝宗震川荆川詩歌古文得力於杜陵昌黎李光地讀其詩歎賞不置又云以真學術名世不徒在詩文間志府

黃志瓊字曾韞號玉齋晉江人康熙癸丑進士綜覽羣經尤工書法授內閣中書舍人詔制誥勅多出其手下直卽手一編不輟所選唐宋文韓詩爲後學津梁著有留耕堂集得閒堂詩集黃氏家傳

莊延祐字素思安溪人康熙己未進士選庶常奉

福建續志 卷五十四 文苑二 九

旨編纂十六國史以病歸郡士以文就正多所造

就志府

李日燧字性甫安溪人幼卓犖其學長於史書自春秋內外傳司馬氏而下雨漢南北朝史及涑水通鑑皆能熟識默誦而屈指其興廢成敗順治乙未家陷於賊兄日燦見賊魁請傾家貲以贖魁佯許之而窮以力所不能日燦曰此非可以情理邀也夜與兄私視賊壘巖壑形勢曰此守衛羸弱可奪令共兄懸崖出鳩鄉衆夜搗賊巢而脫全家於難後絕意仕進優游田里族黨推爲典型志府

何龍文字信周號夙菴晉江人康熙戊辰進士授庶吉士未第教諭長泰遷汀州府教授修泮宮條學規士人多所獎拔既館選乞歸營葬以疾卒著有

春星草堂集

何氏家傳

富中琰字韜上號鮮生晉江人禮部侍郎鴻基子自幼力學凡經史諸子百家及山川輿圖方物之書靡不淹貫年二十遊庠甲寅遭兵亂亟負母逃亂妻牽衣求攜竟絕裾走居喪悉遵古禮三年不飲酒食肉處內由教習選大姚令尋擢遼陽州牧以病告歸官橐蕭然著杜詩集解自著梟羹集燕遊

福建續志

卷五十四

文苑二

十

草晚年又著等韻一書

府志

蔡震升字詔青晉江人康熙庚午舉人少負竒姿詩文有六朝中晚唐風致新城王尙書士正稱爲天才泉帥張雲翼及同里施侯琅延爲上客時與侯官林佶同安阮旻錫之子允讓著有理氣漫言事行卑論二書

蔡氏家傳

張贊宗字子參同安人家政推兄主之兄歿推嫂姪皆不問出入而不私一錢尺布惟慕古好學爲詩文竒思偉論能獨出手眼陳元孝唐海門有酷肖子長並駕錢劉之目年七十三卒著有史評詠古

澹若齋前後編餘狂井桃蠅音詞等集志府

李鍾倫字世得號菜園光地長子性至孝幼治經史性理旁及子史熟貫而析其義復從其叔父光坡治三禮於周官戴記尤盡心焉康熙癸酉舉於鄉卒年四十四居常持身謙退而志氣卓然於古人書務欲窮極幽渺嘗云人於苦處不能尋味如何於樂處有得著有周官纂訓數十卷三禮儀制歌訣一卷四書節記一卷志府

陳夢球字二受同安人以旗籍登康熙甲戌進士擢翰林院編修扈蹕南巡屢蒙褒許著有詩文集

福建續志 卷五十四 文苑二 十一

志府

黃彥標字樹之惠安人有文名又精繪事得宋元逸趣康熙甲戌進士士大夫八閩爭索其畫趾相錯其聲與吾野山人同志府

林之濬號象湖惠安人康熙丙戌進士選庶吉上授編修嗜古博學詩古典雅贍滌著聲南北著有

西村詩文集志府

潘鼎珪字子登安溪人康熙間遊臺灣入庠而歸籍泉州鼎珪天材明敏下筆千言嘗遊交趾著安南紀遊與嶺南陳元孝尤號知交爲序其集著詩文

二十餘卷志府

林霍字子濩同安人博學工詩究心等韻之學著述頗富遊意林壑有蒼湄詩集雙聲譜行世志府

施世駮字文迦晉江人琅第五子少有才思能爲詩歌授府貳不赴琅隸京籍疏請世駮留閩闢城東園有亭臺花木日與郡士大夫爲文酒之讌著有

東園詩集志府

李光北字上卿日焜四子康熙舉人福清教諭盡心春秋內外傳著有春王正月辨論伏窓詩集志府

何維嶽字禮宗號任齋晉江人康熙戊子舉人詩歌

福建續志 卷五十四 文苑二 十二

詞賦自成一家事父母至孝父歿官舍扶櫬歸每夜獨宿舍外以守哀感行路又嘗脫宗族親串之難汀州邱嘉穗稱其至性厚德著有任齋詩文集

何氏家傳

李鍾旺字世蕢安溪人康熙戊子舉人侍世父光地聞讀書之要潛心於濂洛關閩諸書薦充性理精義館纂修考授中書舍人卒著有憶訓錄重申錄周官劄記諸經雜解及詩賦古文詞等集志府

李鍾佐字世諧安溪人年十三從父光地居京師爲文以進張文貞公玉書大竒之曰吾畏友也弱冠

遊庠能極思奧解凡西土所傳歷法及幾何數法
指陳根裔萬支千湊不可胚胎無不冥悟子清植
官禮部侍郎

志府

李鍾僑字世份號仰亭安溪人天性孝友嗜學善屬
文康熙壬辰進士授翰林院編修杜門數十年恬
澹自若督學江右惟誘進人士以經訓實學爲務
會按察使李蘭咨革生員鍾僑難之李密以姑息
劾改補國子監丞公暇修輯舊學所著有論孟講
蒙詩經測義尚書典謨周禮天官易說等書鍾僑
內行純篤在江西以所得俸餘立宗祠宗人有以

福建續志

卷五十四 文苑二

十三

居屋售者諸子已與訂約鍾僑聞之立還其券而
不徵其直曰吾不忍也子清載清江清芳俱世其
學清載雍正庚戌進士○○知府清芳乾隆丙辰
進士由翰林歷兵部侍郎

志府

世拱顯字爾韜號小山康熙癸巳舉人九歲能文弱
冠安溪李光坡延之所纂十三經註疏多互相參
訂詩詞古文哲然名家後授永定教諭以老疾辭
著四書管窺詩經輯要詩文集

世氏
家傳

李天寵字世來號鑑堂安溪人勵節撻邃於經學康
熙乙未進士授庶吉士擢編修在史館二十年與

弟鍾僑以氣節學問相高鍾僑歿於京護其喪歸以著書講道爲業疏注六經子清時乾隆壬戌進士入翰林山東運河兵備道志府

黃夢琳字球卿晉江人邑諸生性清介好學少得吳

喬詩法古今體彷彿中晚唐著有雪舟詩集詩學

正宗黃氏世
係紀

李清濂字信侯安溪人祖光地命受業於徐用錫何焯學博而醇康熙丁酉舉人授定南知縣丁母艱服闋薦舉博學宏詞復補興國縣決獄平允以勞卒清濂爲文踔厲風發汎涉經史子集百家釋典

福建續志

卷五十四 文苑二

十四

於歷代典章制度沿革莫不切究尤精於音學書法所著有經史新記壁經梅書辨贗詩文等集志府

楊廷勳本名廷選字青仲號仙洲晉江人康熙辛丑進士選庶吉士授編修充四朝國史館纂修廷勳篤好經籍每下直手不釋卷著詩文集若干卷志府

張對墀字丹颺號仰峰同安人居晉江康熙辛丑進士授大康知縣殫心撫字後以與友人書被逮卒於配所對墀博學多識工時藝詩古文尤奧衍宏深力追古人所著有同江詩文集志府

陳紹芳字德侯號庭思晉江人雍正甲辰進士授肥

鄉令以不能脂韋去職工詩詞古文顏柳書法及岐黃青囊術

志府

李清江字皋侯鍾僑子雍正癸卯舉人爲文章援筆直書頃刻千百言竒趣天溢莫能窮其巧弟清愷

字振侯雍正己卯舉人俱有文名家

李氏傳

吳振蛟字層三號桃江南安人雍正庚戌進士分發

廣東知縣未得缺而卒振蛟德性粹然少有文名

肄業鼇峰從巡撫張伯行編纂儒先諸書講身心

切己之學及奉檄至粵上官咸重之

洪默齋撰誌

李光型字儀卿日焜次子少問學於從兄光地研究

福建續志 卷五十四 文苑二 十五

有心得雍正丙午舉於鄉癸丑 詔舉理學朝臣

以光型薦 特賜進士擢河南彰德同知有循聲

遷刑部主事充律呂館三禮館纂修以疾告歸著

有崇雅堂文集臺灣私議趨庭錄

志府

王士讓字尚卿安溪人安貧勵志篤嗜經學中雍正

壬子副榜舉博學宏詞以薦充三禮義疏館纂修

議叙授湖廣蘄州判所著有六經訓解同榜王元

芳字鼎汝工詩文卓然名家與士讓同舉詞科

志府

洪科捷字成仲號默齋南安人性孝友且篤於宗族

嘗葺先墓建宗祠考朱子家禮訂定規條以教族

人當丙午夏泉郡穀價驟昂科捷告於積粟者平
糶邑賴存濟尋以舉人司諭浦城惟以振學校興
文教爲事自是鄉薦者接踵乾隆己未成進士選
庶吉士卽告養歸奉親之暇益以敦倫潛學訓子
弟鄉里咸服其教爲文簡古詩尤工雅年七十三
卒子世澤乾隆丁巳補試詞科入翰林授檢討學
尤淵邃節家傳

出科聯字乾甫惠安人乾隆戊午鄉薦第一己未進
士入翰林邸中扃戶讀書絕不事投謁詩文爲時

賢推重

府志

福建續志

卷五十四 文苑二

十六

漳州府

宋

吳桓字孟文龍溪人元豐進士熙寧間陳三要三術
指切時務官至朝散郎攻古文詞有文稿及古律
詩百篇傳於世

府志

李則字康成龍溪人試太學不得志浩然東歸教授
生徒如楊汝南李恂輩皆出其門累薦鄉書紹興
間以特科授桂嶺簿攝富川令調德化所至有惠
政則學得之程蘇二家有文集教人以仁義爲本

道南
源委

鄭公顯字隱之龍溪人初以周禮魁鄉書又以詞賦預薦登乾道丙戌第調富沙戶曹獻時事十論宰同安縣有惠政進權刑部郎官兼權直學士院遇慶會聖節宰臣率百僚拜表就公顯索文援筆立成甚工歷官至中奉大夫公顯爲文切當有法度尤長於儷語廟堂表制多出其手有文集十卷時事論十篇及語錄

縣志

鄭公敏字明之龍溪人乾道己丑登第歷福清簿有政聲以薦調古田教官理學見重於時著文集語

錄傳世

道南源委

福建續志

卷五十四 文苑二

十七

元

王吉才龍溪人篤志古學尤明典禮郡守延爲弟子師後爲泉州學政親歿哀慕痛毀雖老年不異孺子平居斂容未嘗見疾言怒色學者稱益齋先生

道南源委

明

鄭深道名文彖以字行龍溪人洪武初領鄉薦授程鄉教諭遷寧波教授屢應聘典順天湖廣江西廣東試陞司經局校書入侍經筵讀書制詞以學問老成操履清真褒美之年七十致仕徜徉雲水間

著有存養輯答棲遲集

志府

黃文史字廷實長泰人少穎悟博極羣書洪武中應試南畿作五經題有司以違式取旨太祖讀其天下一家論大異之御批實第一免會試授刑部主事以事忤旨貶江西推官爲屬官所陷謫戍大同生平著述甚富惜軼不傳

志府

陳鳴球字舜夫詔安人性至孝家貧力學嘗與湛甘泉論體認工夫謂工夫無處不貫然下手處不可不知甘泉歎服又與薛中離講明良知之旨證吾心之無二鳴球明於理學而於天文陰符諸書尤

福建續志

卷五十四

文苑二

十八

精曉所著有道心圖體認要解欽齊集外陣圖解

志府

邱原高漳浦人磊落不羈聞羅洪先講學江西徒步從之刻志苦思有悟而歸語人曰吾昔憑氣今憑理昔信理今信心然後乃知學之能變化氣質也

志縣

林魁字廷元龍溪人宏治進士自幼博聞強記落筆多竒旣釋褐益肆力墳典授戶部郎西僧大來法主奪民田四百頃魁疏其不法田竟歸民歷官廣東叅政乞休歸闢草堂於白石村自號白石乞言

問字者門無虛日著有白石稿歸田錄志縣

潘鳴時字徵平海澄人家貧就外傅樵採以資學業
出遊吳會謁王畿講學而歸益聚徒討論於本里
行鄉約積義倉練鄉兵以防不測會五寨草寇發
以所練鄉兵平之講徒日衆由恩貢判信陽州以
拂當道罷著有讀易偶見語錄等編時同郡施仁
字近甫博洽善屬文高則賢善講經周一陽以名
節著與鳴時潘桂芳號稱五賢閩士負笈至者無
慮數百人志府

戴廷槐字元植長泰人束髮修古於書無所不窺隆

福建續志 卷五十四 文苑二 十九

慶二年應恩貢入南雍姜公爲大司成廷槐與姑
蘓張幼于齊名姜嘗云用賦張也升堂小戴入室
矣一時詞人盡傾以母老捧檄爲遂安尹用經術
飾吏治因忤當道罷歸著有就正文畧製錦堂集
樵談藪易學舉隅革節卮言志府

林纘振字公悅漳浦人少應試督學周宏祖閱其卷
無草稿而字復端楷若夙構者心疑之面試入關
三道論頃刻立就周歎爲竒才置第一登萬歷進
士授工部主事司節慎庫中貴人僞傳造象床取
庫金萬計纘振抗聲曰取庫金不下大司農而以

一貴人傳旨庸知非詐乎中貴人語塞而去著有
海雲館集志府

劉庭蘭字國徵漳浦人賦才雋穎攻古文詞發閩解
與兩都魏允中顧憲成稱鼎立庚辰同第南宮以
氣節相慕值允中上疏忤旨責判陳州卽以書請
於許國語殊懇激都人壯之未幾卒於家少與伯
兄庭芥庭蕙自相師友稱爲三劉志縣

黃以陞字孝翼龍溪人崇正間舉孝廉以母老不就
遍歷天下名區多所題咏有七州詩集與同里黃
道周張燮稱金石交歷知寧波府歸著述極富今

福建續志

卷五十四 文苑二

二十

存麗典新聲及蟬窠集志縣

林子雲字質夫漳浦人潛心理學躬行實體融州教

授著易說十卷源道南委

國朝

陳箴字于寶龍溪人順治中恩貢歷平和邵武建寧
連城教諭所至有聲巡撫張伯行禮重之詩有中
晚唐風格著晚簾詩文集與同時洪理順齊名志縣

蔡璧字君宏漳浦人宗禹曾孫康熙王子拔貢文名
噪成均四明陳汝咸宰漳浦嘗稱爲今之黃叔度
事親至孝丙辰授羅源博士躬爲文以課士巡撫

張伯行廉其名延至三山先後主鼇峰共學兩口
院九郡士多稟學焉生平教人在篤於倫理嚴於
義利不以空談性命爲高子世遠自有傳志府

李基益字時行海澄人康熙甲子舉人九歲善屬文
解聲律遂以詩名後司鐸永定尋乞休日以著述
爲事嘗鏡古今之得失傷事物之盛衰作史論感
鄉俗之偷憂生民之蹙作閩漳詩思微言之將絕
念末學之傾頹作心宗其餘喜怒哀樂悉寄之詩
著有易經解心宗諸集志府

葉先登字岸伯長泰人幼警敏康熙壬辰成進士授

福建續志

卷五十四 文苑二

二十一

翰林檢討爲涼州道轉冀南左遷別駕歸性好學
著有易經解餘猶手自抄錄有木天草敝帚集志縣

鄭子江字民仲龍溪人篤志讀書屏絕人事詩古文
詞皆工與鄭亦鄒齊名時稱二鄭康熙庚子舉人
著沙村集志縣

陳祖虞字子篤漳浦人年未三十棄舉子業務爲聖
賢之學嘗註釋離騷左傳及哀江南賦著葛亭艸

二集志縣

王道字直夫漳浦人博學工吟咏少以詩受知於學
使沈涵名日起北遊京師宗伯吳文恪公士玉甚

器重之道自諸生以至筮仕每有餘暇輒手一卷
不輟所爲詩從近體入更尋味於古風樂府沉鬱
雅健氣味淵蔚俱不懈而及於古著有詩集採二
希堂

集

戴侯焜字仲江工古文尤精史學綜括羣書作史貫
二十一卷康熙丁酉副榜雍正乙卯舉于鄉年七
十矣乾隆丙辰授國子監學正縣志

莊元字步沂龍溪人少篤學任龍巖學正尋調鳳山
修學宮輯郡志乾隆甲戌成進士授庶吉士著春

齋詩文集

縣志

福建續志

卷五十四 文苑二

二十二

鄭誠中字葦齋龍溪人歲貢生內行純潔尤以文豪
於鄉與鄭亦鄒吳鐘戴盼諸名流服襄驂駕狎主
齊盟子蒲乾隆甲戌進士縣志

延平府

晉

廖安將樂人年十歲讀易春秋二經作文如注尤以

詩名

府志

廖衡順昌人性警敏六歲能屬文縣尉催租見之命
吟雨中山茶有淚多陳后愁離殿浴出楊妃困倚
欄句尉大竒之名聞於郡郡守檄縣以禮遣試以

詩立就既冠赴鄉舉主司得其文寘第三守耆私
易之自是絕意功名終老林壑書閩

元

蕭山沙縣人舉端平二年特科仕長溪縣丞性穎敏

於書無不讀究理精奧著有讀書傳論語講說讀

易管見道南源委

明

黃起莘南平人由歲薦司訓莆田所拔皆知名問奇
者雲集遷太寧教諭歸家居淡素嘗著書經講義

四書講義詩文集縣志

福建續志

卷五十四 文苑二

二十三

盧兆字吉夫順昌人博覽羣書詩極華贍以選貢司
訓分宜庚子應鄉試不售遂棄官歸開詩禮二館
專以誘掖後學爲事士之及門者多成令器府志

黃文梯沙縣人學問洽博善古文詞工草書嘉靖庚
子舉人令餘干調保昌所至有惠政致仕歸談經
啓迪有益後學最多

樂文解沙縣人學務窮理時羅洪先解心性學文解
往從之羅欣然曰吾老友也嘗以四勿之語相質
羅曰致力於心心存於事物未接之先如此克己
方有着落此須持行自見未可得之口說也文解

服膺以行漸有造詣擢鳳陽教諭與南海歐大伍同徵修實錄又令編輯薛瑄語錄後調雷州謝病歸著有一沙文集詩集志縣

盧應瑜字叔忠順昌人隆慶丁卯舉人知遂溪縣遷

潮州同知治河有功掛冠歸養著書闡明格致一

貫中和夜氣之旨道南源委

余履信字順卿南平人有聲譽序萬歷辛卯中應天副車歸叅楊羅李朱四先生宗旨四方之士歸焉

志府

廖鐔將樂人幼機警敏悟性嗜博洽弱冠補弟子員

福建續志

卷五十四 文苑二 二十四

不屑屑於帖括著史論二部爲詩四萬三□百名橄欖集備唐諸家體戊子爲賊所害志縣

國朝

毛章業南平人性醇厚而肆力於學執筆爲文矯然流俗之外由諸生貢入成均一鄉稱其孝友凡諸兄之食飲服御與子弟之婚娶誦讀皆身任焉著有蔚廬詩文集志縣

福建續志卷五十四終